



官
珠編
卷一

和
635
1



門木和
號 635
卷 1



杜氏編珠補序

隋安陽令中山杜公瞻撰編珠四卷。新舊唐書志經藉藝文無之。至宋始著。於錄其書流傳特罕。故晁氏郡齋讀書志。趙氏附志。陳氏書錄解題。均未之載。而唐宋元群書亦鮮有引之者。是書予獲之中簿。手抄以歸。惜闕其半。今詹事府詹事錢唐高君按其目補之。先是刑部尚書岷山徐公既序之以行。而詹事復屬予爲序。予惟類書

始南北朝當時文尚駢儷學者爭以洽聞
周見相高如朱澹遠有語麗又有語對徐
僧權有編略顧其書皆不傳論者遂以修
文殿御覽爲古今類書之首今亦亡之惟
隋著作郎杜臺卿所撰玉燭寶典十二卷
見於連江陳氏世善堂書目予嘗入閩訪
陳後人已不復可復則類家當首公瞻是
書宜詹事亟補之以傳而儲藏家得之以
爲創獲也獨怪史稱隋禁七緯發使四出

凡讖緯相涉者皆焚之爲吏所糾者至死
而杜氏經進之書仍取括地象通卦驗援
神契元命苞及尚書中候之文考永興虞
氏書抄成於隋秘書省之北堂亦采及諸
緯然則史固有不足盡信者與或當日所
焚不過王明鏡閑房金雄等記而非槃昇
之炎火斯乃乾鑿度禮含文嘉之得以至
今存也公瞻爲臺卿之兄子父曰開州刺
史蕤而膠州刺史弼者其祖也有子之栢

官起居舍人見隋書又有同心芙蓉詩載續玉臺新詠尚書序謂無表著故具書之

右從曝書亭集錄補

編珠四卷隋大業七年著作佐郎杜公瞻奉敕撰也凡十四門門各有類惟取其事之切於用者故卷表不多攷隋經籍唐藝文二志並無此書他書錄亦皆不著蓋凋零磨滅久矣詹事江村高公偕余奉

命校勘閣中書籍得之已逸其後二卷詹事喜而錄之既南歸則又加之是正而博采故實以補其闕仍爲四卷又

廣其門類之未備者外爲二卷而編珠乃爛然成書矣按歷代史志有雜家而無類書新唐志始別爲一目自魏晉以逮南北朝君臣宴集每喜徵事以覘學問類書于是漸多然今世傳歐陽詢虞世南徐堅所排纂皆唐初時人而志所載隋以前書如皇覽類苑壽光書苑華林遍略等書當時極貴重其卷帙頗繁今皆無一簡存

者卽如戴安道顏延之之纂要沈約之袖中記珠叢其書不過一二卷亦盡已散逸獨編珠猶得其半詹事從而補綴使殘缺以完豈非快事與閣中書籍虞山錢氏以爲數代之遺編在是而明末多燬于兵火以余所見萬曆時張萱內閣書目存者十不得一二猶往往有宋雕舊本并皇史宬所藏永樂大典鼎革時亦有佚失往

後序
者嘗語詹事值

皇上重道右文千古罕邁當請

命儒臣重加討論以其祕本刊錄頒布用
表揚前哲之遺墜千萬一余老矣詹
事孜孜好古能闡幽表微幸來日勿
忘此言也杜公瞻亦無表著談藪嘗
載隋京兆杜公瞻嘗邀陽玠過宅酒
酣嘲謔者卽此公瞻無疑吾未知其
人何如顧得藉我詹事以存此書有

厚幸已康熙三十二年十月朔日健
菴徐乾學書



凡例五則

一杜公瞻原本凡存二卷後二卷止存原目不量固陋因而補之未免續貂庶成全璧

一原本計十有四部於事物亦略該矣然有天地而無歲時則束皙之辨奚徵有果實而無花木則終軍之對莫辨至如人倫文學金重儒林鳥獸魚蟲旁資談柄卷帙雖簡不可以不備也因成續編

珠二卷

一原本二卷每部中多有增補非陋其不
贍也為徵事者廣異聞多多益善耳
一補本但用隋以前事恐入後代與原本
體例不合也續本則隋唐參用宋以後
事例不采其有宋人書載唐事者間一
用之

一字尚新穎對取工巧兔園常談槩刻不
錄或事涉隱僻不合於用者亦從割置

皇帝在江都曰好為雜咏及新體詩偶緣
屬思顧謂侍讀學士曰今經籍浩汗子史
恢博朕每繁閱覽欲其故實簡者易為比
風爰命微臣編錄得窺書囿故曰之曰編
珠其朱書者故實墨書者正義時大業七
年正月奉敕撰進勒成四卷著作佐郎兼
散騎侍郎臣杜公瞻謹序

編珠原目

隋著作佐郎兼散騎侍郎杜公瞻撰
詹事府詹事兼翰林院侍讀學士高士奇補

第一卷

天地部

山川部

第二卷

居處部

儀衛部

續珍原目

音樂部

第三卷 以下補遺

服玩部

珍寶部

繒綵部

酒膳部

第四卷

黍稷部

菜蔬部

果實部

車馬部

舟楫部

續珍原目

編珠第一卷

隋著作佐郎兼散騎侍郎杜公瞻撰
詹事府詹事兼翰林院侍讀學士高士奇校

天地部 增補十四條

九野四荒

呂氏春秋曰天有九野中央曰鈞天東方曰蒼天北方曰亶天西北方曰幽天西方曰皓天廣雅作成天西南方曰朱天南方曰炎天東南方曰陽天又太亶

經亦有九天 爾雅曰地有四荒孤竹
北戶西王母日下也

天柱地軸

列子曰共工氏怒觸不周山天柱折地
維絕 河圖括地象曰崑崙之山橫為

地軸

天維地脉

宋玉大言賦曰壯士歛兮絕天維北斗
戾兮泰山夷 山海經曰洞庭穴在長

沙巴陵今吳縣南太湖內有山山有洞
庭穴地道潛形名曰地脉

日車月馭

李尤九曲歌曰年歲晚暮時已斜安得
壯士翻日車 司馬相如上林賦曰陽
烏驟乘織阿為馭注曰織阿月馭也

日迴烏翼雲起魚鱗

左思蜀都賦曰陽烏迴翼於高標 呂
氏春秋曰山雲草莽水雲魚鱗旱雲烟

火雨雲水氣

神女爲雲姮娥託月

宋玉高唐賦序曰襄王夢一婦人曰妾
在巫山之陽高唐之隅朝爲行雲暮爲
行雨張衡靈憲曰羿請不死藥於王
母姮娥竊之奔月宮

日下桑枝月中桂樹

山海經曰暘谷上有扶桑十日所浴九
日居下枝一日居上枝虞喜安天論

曰俗傳月中仙人桂樹今視其初生見
仙人之足漸已成形桂樹後生

破環月連珠星

抱樸子曰月初生如破環易緯曰至
德之明日月若合璧五星如連珠

編珠星破鏡月

尚書中候曰天地開闢甲子冬至日月
如懸璧五星若編珠古詩曰藁砧今
何在破鏡飛上天

金波月玉葉雲

漢書郊祀歌曰月穆穆以金波日華耀以宣明 崔豹古今注曰黃帝與蚩尤戰於涿鹿之野常有五色雲氣金枝玉葉止於帝上有花葩之象因而作華蓋又陸機雲賦曰玉葉金柯

車蓋雲弓弦月

魏文帝詩曰西北有浮雲團團如車蓋釋名曰弦月之名也其形一旁曲一

旁直若張弓上弦也

重輪月連蓋雲

古今注曰漢明帝時太子舍人作歌詩四章以贊太子之德一曰日重光二曰月重輪三曰星重耀四曰海重潤 易通卦驗曰冬至初陽雲如樹木立春如積水春分如白鵠穀雨如連蓋立夏如赤珠夏至如水波寒露如冠纓霜降上如羊下如磐石

絳衣雲素扇月

兵書曰韓雲如布趙雲如牛楚雲如日
宋雲如車魯雲如馬衛雲如犬周雲如
輪秦雲如行人魏雲如鼠齊雲如絳衣
越雲如龍蜀雲如困班婕妤詩曰新
製齊紈素皎潔如霜雪裁爲合歡扇團
圓狀明月

西北雲東南日

漢武故事曰宣帝祠甘泉紫雲從西北

來散於殿前古樂府詞曰日出東南
隅照我秦氏樓

濯枝雨觸石雲

周處風土記曰六月常有大雨名濯枝
雨春秋公羊傳曰泰山之雲觸石而
出膚寸而合不崇朝而雨徧天下

南箕月北斗雲

春秋說文曰星有好風月離於箕又詩
小雅云維南有箕不可以簸揚易飛

候曰北斗旁有雲黑蒼色細如杼軸蔽
日月五日必雨

北堂月西牖風

陸機樂府詩曰安寢北堂上明月入我
牖照之有光彩覽之不盈手 孫綽詩
曰迢迢雲端月灼爍霞間星清商激西
牖澄景獨南楹

五日風一旬雨

論衡曰太平之時五日一風風不鳴條

鹽鐵論曰周公之代旬而一雨雨必
以夜丘陵皆熟

覆船雲倒井雨

京房易飛候曰天晴而有黑雲如覆船
於日下當雨 傅玄詩曰霖雨如倒井
黃潦起洪波湍流激垣牆門庭若決河
枯竹雪拔樹風

漢書王莽傳曰天鳳二年大雪關東尤
甚深者一丈竹枝皆枯 晉中興徵祥

記曰永昌元年大風拔樹百根

應鼓雨叩鐘霜

史筌武昌記曰鳳凰山有石鼓石鼓鳴天必大雨左思蜀都賦曰應鳴鼓而興雨 山海經曰豐山有九鐘霜降則鳴動花風潤葉雨

楊泉物理論曰風怒則飛砂揚礫喜則搖枝動花 西京雜記曰董仲舒答鮑敞云太平之世雨不破塊潤葉也

凝檐霜潤草露

曹毗咏冬詩曰寒冰盈渠結素霜竟檐凝 春秋元命苞曰陰陽散而露下露下以潤其草木也

少男風童女電

管輅別傳曰輅遇清河太守時天旱輅曰今夕當雨樹中已有少女微風樹間又有陰鳥和鳴又少男風起衆鳥亂翔其應至矣果大雨 傅玄詩曰童女掣

電策童兒挽雷車

真人氣處士星

關令內傳曰老子西游之流沙尹喜望紫烟而嘆曰此真人之氣也 晉陽秋曰謝敷隱居若耶山日犯少微星一名處士星俄而敷死

黃雲赤雪

傅玄菊花賦曰紛漫衍以彌望若黃雲之依中原 晉朝雜事曰太康七月十

日河陰下赤雪

絳雪赤雲

漢武內傳曰仙之上藥有玄霜絳雪

東方朔別傳曰有赤雲如冠珥上以問朔朔曰不大雨即日暈後數日果大雨丹霞素霧

左思蜀都賦曰舒丹氣而為霞 湘州

記曰曲江縣有銀山山多素霧

榮光佳氣

尚書中候曰堯沉璧于河榮光出河休
氣四塞 後漢書曰春陵佳氣鬱鬱葱
葱

雌霓雄雷

月令曰季春之月虹始見注曰雄曰虹
雌曰霓 師曠占曰相春雷始起其音
拍格拍格者雄雷主旱其鳴依依隱隱
不大霹靂者雌雷主水

君子大王

風角曰風不及地二三尺者此仁人君
子之風 宋玉風賦曰夫風起青蘋之
末盛怒於土囊之口緣於太山之阿舞
於松柏之下徘徊椒桂之間翱翔激水
之上獵蕙草離秦蘅北上王堂躋乎羅
帷經乎洞房所謂大王之雄風也動沙
壠吹死灰此庶人之雌風也

决河倒洛

上見倒井雨中 夏侯孝若雷雨賦曰

若覆河而懸井似翻伊而倒洛

馬頭鴨子

漢書曰武帝元年十一月雨雹大如馬頭
晉中興書曰泰興三年海鹽縣雨

雹大如鴨子

此下補入

戊申雲壬子雨
黃子發相雨書曰戊申日候日欲入時
上有冠雲不問大小視四方黑者大雨
青者小雨
管輅曰今夕當雨傳曰近

補

壬子曰位滿星中已有水氣食頃至也
五色露九光霞

洞冥記曰東方朔遊吉雲之地武帝問
曰何名吉雲曰其國常以雲氣占吉凶
若吉事則滿室雲起五色照著於草樹
皆成五色露露味甘
十洲記曰朱霞
九光

飲龜露生獸風

洞冥記曰元封二年數邊國獻能言龜

一頸長一尺二寸。東方朔曰：惟承桂露以飲之。十洲記曰：炎洲在南海中，上有風生獸，似豹青色，以鐵椎鍛其頭數十下，乃死。張其口向風，須臾而起。

樊英雨薊子雲

楚國先賢傳曰：樊英隱於壺山，嘗有暴風從西南起，英謂學者曰：成都市火甚盛，因含水西向澆之，乃令記其時。日後有從蜀郡來者云：是日大火，有雲從東

起，須臾大雨，火遂滅。搜神記曰：薊子訓到洛，見公卿數十處，後數十處皆有雲起。

從星月干日雲

尚書洪範曰：庶民維星，星有好風，星有好雨，月之從星，則以風雨。注：月經於箕，則多風，離於畢，則多雨。京房風雨要訣占候曰：朝雨法，有黑雲如一匹皂，于日中，即一日大雨，二匹二日雨，三匹十

日雨

樹上日井中星

淮南子曰日西垂景在樹端謂之桑榆言其光在桑榆樹上也尸子曰自井中視星所見不過數星自丘上以望則見始出也非明益也勢使然也私心井中也公心丘上也

紺碧霜豆黃露

王子年拾遺記曰廣延國常雨青雪冰

霜之色皆如紺碧洞冥記曰武帝問東方朔曰若云五色露可得否朔乃東走至夕而還得豆黃青露盛之玩器以授帝帝徧賜羣臣老者嘗之皆少疾病皆愈

天酒地汁

神異經曰西北海外有人長二千里兩脚中間相去千里腹圍千餘里但日飲天酒五斗張華注云天酒甘露也五

經通義曰陰亂則為霧從地汁也

玉虹金霧

搜神記曰孔子作春秋制孝經既成齋戒向北辰而拜告備於天乃決鬱起白霧赤虹自上而下化為黃玉拾遺記曰平沙千里色如金細如粉風沙起如霧亦曰金霧

繒雲絲雨

易通卦驗曰立秋濁陰雲出如赤繒

張協詩曰金風扇景節丹霞啟陰期騰雲似漏網密雨如散絲

甜雪甘霜

拾遺記曰西王母進周穆王以擘州甜雪又曰擘州霜甘也

風母雨人

劉欣期交州記曰風母出九德縣似猿見人若慙屈頸打死得風還活盛弘之荊州記曰臨賀界有臥石似人而色

青黃隱起。此鄉若旱，祭之必雨。

飲星夢月

續晉陽秋曰：桓宣庶母馬氏，本袁真之妓，與同列薛氏、郭氏，夏夜同出，月下有銅甕，水在其側，見一流星墮甕中，如火珠，乃相謂曰：此吉祥也。于是各以瓢杓，接取，薛郭並不得，馬最後取，星入瓢中，飲之。若有感而懷宣，謝莊月賦曰：委照而吳業昌，淪精而漢道融。注：夢月入

懷生子為帝王

逃雨避雷

文子曰：若與俗處，猶走而逃，雨無處不濡濕也。盛弘之荆州記曰：湖陽縣春秋蓼國，樊重之邑也。重母畏雷，為石室避之，悉以文石為堦砌。

山川部 增補十條

白雪山紫雲石

臨海記曰：郡內有白雪山，層巖皓麗如

雪 吳興記曰縣南二里有三嶺皆秀
石崔嵬亘丹雜色狀如紫雲

掛鵠水盤龍山

臨海記曰郡西有白鵠山山水下注遙
望如倒掛白鵠 郭緣生述征記曰鼓
縣盤龍山石上有大人跡又諸葛亮云
鍾山龍盤石頭虎踞

金輿山玉輪坡

述征記曰朗公谷金輿山孤峰瓌秀在

泰山郡 任豫益州記曰復江水源出

玉輪坡下

女郎山新婦石

漢水記曰女郎山昔有貞女棲於此山
卒卽葬焉擣衣石猶在山頭 鄭緝之
東陽記曰永康山有新婦石

長松磴春草巖

穆天子傳曰天子南還昇長松之磴至
鉏山之陽 東陽記曰北山南面有春

草巖巖澗盡生龍鬚草

桂英巖楓林嶺

徐先生南岳記曰仙嶺數百步得桂英巖昔人於此採桂英謝靈運游名山志曰楓林嶺石潭溪桂林嶺白晝結陰盛夏凝冰近山之遠遠山之近有若羅穀映於巖間俯觀木末仰視星羅

斷雲山明月峽

述征記曰臨沂縣蒙山望之如橫雲中

斷 庾仲雍荊州記曰巴東三峽一名

明月峽

玉女岡仙人石

王孚安成記曰玉女岡天欲雨水便湧出于石間色有玄黃故人謂之玉女披衣羅浮山記曰浮山東有別山山上有石門樓樓北有六石各高十餘丈儼若人狀故謂之仙人石

披衣石掣練泉

上見玉女岡 桓氏臨汝記曰靈谷山
半巖有瀑布晴日望之如掣練

玉女臺皇后室

嵩高山記曰山北有玉女三臺漢武於
此見三仙女故名 荊州圖副曰新野
縣東安陸山山下有石室謂之皇后避
雷室

屏風石障日山

孔靈符會稽記曰赤城山有石橋橋上

有石屏風橫絕橋上 伏琛齊地記曰
平昌郡有并山峰高障日

聖渚水仙壇石

名山志曰石匱下有渚土人謂之聖人
渚 南岳記曰仙人壇青石而有白石
文可容人坐東望湘水如白帶水聲如
琴鳥鳴如歌

萬歲水千秋池

三齊畧記曰不其城西南方有萬歲水

水北有萬歲亭。是漢武帝造。益州記曰。城東有平陽山。山間有池。周圍數頃。名千秋池。

桐樹山桂林水

永嘉記曰。郡西有桐樹山。又有栢林水。

梧桐水。桃枝水。廣州山川記曰。有白

靈水。白沙水。靈鳥水。牛鼻水。桂林水。

陰陽石風雨池

荆州圖副曰。銀山縣西。有三大石。並立

燕尾洲鷄頭水

穴中。俗云陰陽石。陰石常濕。陽石常燥。每水旱。居人作威儀服飾。往入穴中。旱則鞭其陰石。雨則鞭其陽石。雷次宗豫章記曰。洪井北有風雨池。山高水激。霏散遠灑。如風雨。瀾泛于數百里中。

荆州記曰。江陵城南岸。有燕尾洲。洲上有城。南岳記曰。衡山縣白馬山。山上有泉。名雞頭水。

暴練河縈帶海

劉蒼劭山記曰。黃河去劭山二百餘里。望之如暴練。羅浮山記曰。浮山東嶺。杳冥東南望海。有如縈帶。

治鷄水爛鳥泉

華陽國志曰。越雋郡南有湯泉。冬夏常熱。其源可以治鷄豚。又裴淵廣州記曰。龍州縣石徑里有一澗流。熱水足治鷄鴨。丘淵之征齊道里記曰。曲城縣有

湯泉。鳥墜輒爛。

九層山百尺水

張僧鑿潯陽記曰。廬山周圍四百餘里。疊嶂九層。崇巖萬仞。齊地記曰。平昌郡有弩山。山中有池。名百尺水。

八支河九派江

漢書溝洫志曰。北條八支。注曰。本有九河。今塞其一。郭璞江賦曰。源二分于岨崃。流九派於潯陽。

虎牙山鳥翅石

荆州圖副曰夷陵縣有虎牙山石文黃白有似虎牙東陽記曰郡內有九聲石形如鳥翅

龍尾溪兔頭峴

徐道士名山畧記曰羅浮有龍尾溪

續述征記曰梁父縣有兔頭峴

鸞鷲峴鳳凰岡

征齊道里記曰營丘北十里有鸞鷲峴

下帶長澗郭仲產荆州記曰安陸縣有鳳凰岡中有黃瓊墓

黃牛江白狗峽

盛弘之荆州記曰西陵峽有黃牛江其途難進語曰朝發黃牛暮宿黃牛三朝三暮黃牛如故又夷陵縣有黃牛灘永初山川記曰歸鄉縣有白狗峽形影起伏如狗

菖蒲海茱萸江

漢書西域傳曰于闐河與蔥嶺合東流注菖蒲海亦名鹽澤其水冬夏不增減
湘州記曰邵陵縣有大溪名茱萸江
地脉湖天臍海

周處風土記曰太湖中有山山下有穴潛行地中無所不通謂之洞庭地脉
春秋括地象曰河有九曲發崑崙為地首至積石為地門出龍門為天橋至卷重山為地咽貫砥柱觸闕流山為地喉

至洛汭為地腰至大伾山為地齒至大陸為地腹東至碣石入於海為天臍
新婦灘美人瀨

漢水記曰梁州有新婦灘黃金灘
鑿齒南征賦曰停美人之名瀨眺越女之奇石

東馬山墜牛嶺
史記曰齊桓公西伐登東馬懸車卑耳之山
漢水記曰從魏興郡至南鄭城

九百里有墜牛陽都寒泉三嶺皆極高峻

天台地肺

支遁天台山銘序曰剡縣西有天台山蓋仙聖之所棲翔道士之所鱗萃終南山記曰神水一名地肺可避洪水

歌山舞水

東陽記曰歌山在吳寧縣南相傳昔有船從此下過見一女子登山而歌故名

又荊州記曰馮乘縣亦有歌山紀義宣城記曰蓋山有舞水聞人歌舞水即出湧應節

銀山金水

湘州記曰曲江縣有銀山山多素霧永初山川記曰新安縣有金水又戴祚西征記曰洛陽建春門外有金水入金谷塢石崇所居也

竹山桂水

山海經曰竹山出竹水饒蒼玉
楚詞曰桂水兮潺湲揚流兮津津

移山逃石

庾仲雍荊州記曰舞陽有移山山本在北峰因風雨一夜移爲南峯
湘州記曰曲江縣有逃石本在桂陽夜因雷雨失之故名逃石

堯山舜澗

三齊略記曰堯山者堯巡狩所登山山

頂有祠祠邊有栢栢枯而復生不知幾世石上有堯跡東有堯水
南岳記曰舜澗東出舜廟廟下有舜溪

丹溪元澗

郭璞遊仙詩曰雖欲騰丹溪雲螭非我駕
十洲記曰元洲在北海中上有元澗澗水如蜜飲之長生

蘭巖桂嶺

名山志曰蘭巖在蘭溪口竦二峯峯頭

如鳥翅 又曰桂嶺左右叢生桂樹遠望則空翠相映濃淡色分

谷王水伯

老子曰江海所以能為百谷王者以其善下也 孝經援神契曰河者水之伯上應天漢之中

孝水貪泉

潘岳西征賦曰挹孝水以濯纓嘉美名之在茲 荆州記曰桂陽郡有橫溪名

貪泉

太湖少海

越記曰太湖周三萬六千頃吳地理志云周行五百餘里 山海經曰無臯之山南望幼海幼海即少海也

湯谷溫泉

荆州記曰新野城北有紫山山東有溫水名曰湯谷南都賦云湯谷湧其後 郭義恭廣志曰溫泉西者在新豐北者

在廣平。又漢水記曰：漢水有溫泉。冬夏長沸，望見白氣衝天，能愈百病。又荊州記曰：新陽縣惠澤中有溫泉。

直瀆枉渚

伏滔北征記曰：九井山西北有吳將甘寧墓，占者云有王氣。孫皓鑿其後十數里，名曰直瀆。荊州圖副曰：臨沅縣有枉山，山西有溪，溪口有小灣，名枉渚。楚詞曰：朝發枉渚，夕宿辰陽。

風門火井

劉欣期交州記曰：風山在九真，風門在山顶，常吐長風。益州記曰：火井在臨邛縣卓王孫家，又名王孫井。漢室之隆，則炎赫彌熾，桓靈之際，火勢漸微，諸葛一瞰而更盛。至景曜元年，人以燭投之，即滅。其年蜀并於魏。

風井雲泉

荊州記曰：風井夏則風出，冬則風入。

寰中記曰齊國有山山有雲泉春夏出雲以桑柴塞之即止

金井玉泉

荆州記曰益陽縣有金井昔有金人以杖量地輒成井疑是昔人採金謂之金井抱樸子曰崑崙蓬萊等山其上百蟲鳥獸飲玉井及玉泉者皆長生不死橋勢如星沙形似月
華陽國志曰蜀郡城西南有七橋云李

浦

水所造上應七星太康地記曰西海居延縣流沙形如月初生五六日也

落星浦分風湖

此下補入

山謙之南徐州記曰臨沂縣前有落星山今云班瀆即緣江圖所謂落星浦盛弘之荆州記曰宮亭湖廟神有靈驗塗旅祈禱能使湖中分風而帆南北

馬穿穴龍沸潭

荆州記曰佷山縣北有石穴云昔有馬

浦

補

從穴出因復還入潛行乃出漢中漢中
人失馬亦嘗出此穴因名馬穿穴丹
陽記曰句容縣東三十里有龍岡岡嶺
有龍沸潭聞人聲水便沸動常日則不
動

長松阪弱柳江

穆天子傳曰天子南還升於長松之阪
注曰阪有長松緣江記曰西江別支
為弱柳江

補

覆笥山翻車峴

鄧德明南康記曰平固縣覆笥山上有
笥貯玉牒記故山因笥為名江乘地
記曰城東四十五里竹里山王途所經
甚傾險行者號為翻車峴

主簿山令史石

周景式廬山記曰主簿山在胡郎廟南
山下有溫泉王韶之南康記曰湘源
有長瀨其傍石或像人形或似牛羊土

補

編珠卷一
人名人形者爲令史

青黃井溫冷泉

異物志曰廬陵城中有一井中有二色水半青半黃黃者灰汁取作糜粥皆金色土人名灰汁爲金因名爲金井幽明錄曰艾縣輔山有溫冷二泉發源相去數尺熱泉可煮鷄豚冷泉若冰又江乘湯泉半溫半冷共同一壑

熨斗陂香爐石

補

襄陽耆舊傳曰宜城縣東北角有熨斗陂王隱晉書曰洛陽宮西宜秋里門東向南壁石生地中始高三尺如香爐形人多祀之

銀穴金岡

補

沈懷遠南越志曰遂城縣夫人山之東北有銀穴常出烏銀沙顧微廣州記曰四會縣有金岡行人往往見金於岡側

補

方山圓海

補

鹽石酒泉

袁山松宜都記曰西陵東北有方山其
 嶺四方素崖如壁十洲記曰蓬萊山
 周廻五千里山外有圓海環繞水色黑
 華陽國志曰汶山有鹽石煎之得鹽
 十洲記曰瀛洲有玉膏山出泉如酒味
 名為玉酒



